



Prolog Blagette 2022

S Motto heisst: «Mir löön nit lugg».
Drum luege mir uf Theeme zrugg
Die unser Dorf immer no beweege
Denn s Stimmvolgg isch gsi drgeege
Gwüssi Chreis hän versuecht sich zwehre
Und sin Daatsache unter dr Deppich go chehre
Am Schluss sin alli Blaanige für d Chatz
S bescht Bispil isch dr Lindeblattz

D Wägmatte, das syg unser Filetstügg
Plagiere d Bolitigger hütt zum Glügg
Aber vor Johre het dr Gemeinroot welle
Ä Ychaufszentrum uf däm Land erstelle
Und obe druff, s chas kein verstoh
Hät ä Gmeinisaal no selle choo
Do hän ä paar Bürger gseit: «Also nundefahne
Dä Neubau ghört gar nit do aane
Mir chönne sone Brojäggt nit begriffe
Und dien s Referändum ergriffe».
Dr Abstimmigssunntig chunnt und wär häts dänggt
Die «Wägmatte eins» wird in Bapiirchorb versänggt
Mänggs Johr uf däm Gländ, mir dien nit dichte
Göhn d Hünd jede Daag ihr Gschäft go verrichte
Doch hütt – und das isch unser Befinde
Dien mir dä Bolitigger ä Chränzli winde
Statt ä Utopie-Brojäggt het me vernünftig ghandlet
Und das Hunde-WC in ä Gmeinipark verwandelt
Mir alli gniesse jetz die grieni Lunge
Drum sage mir: «Das Wäärgg isch glunge».

D Allschwiler «classe politique», s isch nit gheim
Het au welle abrisse d Villa Guggeheim
Hütt isch die ganzi Gemeinverwaltig froh
Denn das Brojäggt het ä IG unter d Lubbe gnoh
Ä Gmeinzentrum mit eme Saal, hörsch verzelle
Het me welle uf däm Gländ vo dr Villa erstelle
Doch gottseidangg, jetz mien dir loose
Au das Baubrojäggt isch ganz böös in d Hoose
Hütt präsentiert sich d Villa gepflägg und stark
Als Ushängeschild, wie d Villa im Merian-Park

Ä witere unglöste Fall
Isch s Drama um dr Mühlistall
Kunst-Verein und Kulturverein gän sich alli Mie
Löön sich die zletscht über dr Disch lo zie?
Wärde ihri Voorschlääg eventuell vermehrt
Eifach unter dr Deppich kehrt?
Mir roote däne beide Verein, dient druf achte
Und Versprächige au dur d Lubbe betrachte
Ä «Kulturbungger» näbem Heimatmuseum
Die Idee wär uf ä eerschte Bligg gar nit so dumm
Doch unter dr Lubbe betrachtet, zeigt sich bloss
Für unser Dorf isch das ä Schuenummere zgross
Denn zum Schluss, mir wäre eifach nur froh
Chönnte mir wiider ins Heimatmuseum goh

S Motto heisst: «Mir löön nit lugg».
Mir hänn dr Bligg jetz geworfe zrugg
Au in Zuekunft, mir wärde scharf druf achte
Und «Luftschloss-Brojäggt» durch d Lubbe betrachte

d Chrutstorze
Wildviertel-Clique Allschwil